

賤人進告則不給縣布而許令從良何如傳曰依啓○辛未下冬至使尹殷弼狀啓及禮曹公事仍傳曰管押使不嚴軍令以致我國人被殺于唐人官買之物亦致逢賊此赴京使書狀官之能否也團練使捍後將拿推詔獄以示不嚴軍令之罪冬至使書狀官鄭大年等亦令詔獄推之○壬申以南世健為弘文館直提學趙仁奎為典翰梁淵為副應教成倫為校理○夜東西方有氣如火○癸酉右叅贊朴壕卒史臣曰壕成三問外孫也天性真醇不為刻苦之行居官處事雖無出人才智持身謹慎接物以寬位至六卿人亦不異之

二月甲戌朔

上體向寧

○傳曰尚州牧使判官一時罷黜

牧使趙麟判官韓麟

無意救荒發官人于四境掩匿飢民賑恤敬差官黃憲入界即啓罷之

救荒事緊明日為政差出二三日

內給馬催促赴任○乙亥領議政鄭光弼左議政張順孫右議政韓效元等啓曰尚州事臣等見其書狀罪則猶過於罷黜但尚州大邑也地大物衆二官并逝飢民無所賑救迎送之勞民不堪支常時二官俱秩滿則不并適於一時者為是也成宗朝有如此守令或降資雖牧使或有決杖者不可不斟酌其中特命裁斷臣等細知其弊不可不啓傳曰予觀敬差官書狀牧使判官一時并罷反有迎送之弊予意與